

# COMPTE RENDUT

## AG IEO OPM 2024

L'Amassada generala de l'IEO OPM se dobrís a 10h13 amb 19 personas presentas, 53 personas representadas (poders) e dos salariats de l'associacion. La region Occitania/Pirenèus-Mediterranèa e l'Ofici public de la lenga occitana son excusats.

### 1 – Rapòrt moral

Lectura del rapòrt moral per Eric Fraj, president de la seccion regionala.

### 2 – Rapòrt d'activitat

Lo rapòrt d'activitat 2023 es legit per Daidier Mir e adoptat a l'unanimitat.

### 3 – Rapòrt financièr

Los comptes 2023 son comentats per Annia Wolf.

Una question es pausada sul compte 64 e los dreits d'autors, per saber a qué correspondon. Es explicat que de contribucions al *Diari* son comandadas e doncas pagadas, mai que mai pel *Diari* joves. Çaquela la màger part de las contribucions son benevòlas. Es rapelat que normalament se pòt pas comandar quicòm a un benevòle.

Una altra question tòca lo cambiament de ròtle de l'OPLD, qu'apareis encara dins los comptes en 2023 : se distribuís pas pus las subvencions, de qué servirà ? Un pichon debat seguís, que liura qualques pistas, es tanben rapelat que l'OPLD contunha de portar de dorsiers de cotria amb l'IEO OPM, al prèp de la DRAC notadament (pel *Diari*).

Los comptes 2023 son adoptats a l'unanimitat.

#### **4 – Afectacion del resultat**

S'adòpta a l'unanimitat lo repòrt del resultat 2023 sus 2024 (3808,24 €).

#### **5 – Còs electoral**

Lo còs electoral es presentat e adoptat a l'unanimitat.

#### **6 – Budgèt 2024**

Lo budgèt 2024 es presentat e adoptat a l'unanimitat.

#### **7 – Projèctes**

Los projèctes de l'associacion per 2024 son presentats rapidament. Fan pas l'objècte d'un vòte.

#### **8 – Eleccion del CA**

Se presenta una lista de noms del collègi 1 al Conselh d'administracion de l'associacion, lo sol dels 2 a èsser somés a votason (lo collègi 2 es de fait). Los noms son los del CA sortent, amb doas personas novèlas qu'intran. Se prepausa de votar per la lista complèta, a man levada. La lista complèta es adoptada a l'unanimitat.

Lo CA novèl se compausa doncas de :

Marlène BONY

**Jean-Charles COUDERC**

Léo CROS-HUMBERT

Eric FRAJ

Emmanuel ISOPET

**Rodin KAUFMANN**

Jean-Marc LECLERQ

Estelle MAZODIER

Gilbert MERCADIER

Didier MIR  
Alan ROCH  
Marc VIDAL  
Xavier VIDAL  
Annie WOLF

Los noms en gras son los intrants novèls.

## **9 – Reparticion de las adesions**

Eric Fraj explica que l'IEO OPM a participat, long de l'an, a d'acamps tocant a la reparticion e al montant de las adesions a l'IEO, amb de personas de mai d'una seccion. Aquò fa la seguida a de retorns del terrenh sus la dificultat a justificar e defendre de còps la redistribucion de l'argent de las adesions a cada escalon de l'IEO, del departament a l'IEO federal. D'aqueste grop de trabalh n'es sortit un tèxte, que seriá prepausat al vòte a l'AG de l'IEO federal. Eric Fraj fa lectura d'aqueste tèxte e se vòta per que l'IEO OPM presente aquela proposicion a l'AG de l'IEO federal. La proposicion es adoptada a l'unanimitat.

Una question se fa jorn : es que caldrà, se lo cambiament es adoptat, cambiar los estatuts? S'enseguís un pichon debat, ont se vei que los estatuts de l'IEO serián pas totalament a jorn, amb un possible fosc administratiu. Se demanda se çaquela valdriá pas lo còp de gardar un annuari de totas las decisions presas per l'IEO per pas res doblidar e assegurar las passacions d'una còla associativa a una altra.

## **10 – Questions diversas**

Se parla de l'organizacion d'una protèsta novèla, una idèa portada per Per que viscan nòstras lengas (PQVNL). Tot lo monde es pas forçadament d'acòrd sus aquela causa, d'unes aimarián melhor far una peticion, o cridar los elegits locals. De tant que se sap pas se valdriá melhor far una sola protèsta bèla, a París, o las escampilhar sus tot lo territòri.

La mobilizacion sul sol article 2 convenç pas tot lo monde, qu'una modificacion constitucionala pòt crispar las gents e far completament fracàs vist l'estat de las causas.

Una altra proposicion emergís, aquela de cambiar de çò que se fa d'acostuma e dempuèi d'annadas, es a dire jogar sus la visibilizacion de la lenga en defòra del temps de las manifestacions, per exemple en escrivent al monde economic per butar a l'utilizacion de

l'occitan dins aquel sector.

D'autra part, se parla d'una accion mai culturala, amb un festenal de las lengas minorizadas, mas caldrà aver de temps per plan far las causas.

Se senhala que 2025 marcarà lo 80 ans de l'IEO e que seriá temps de pensar a çò que se farà.

Una altra proposicion es feita per butar las collectivitats, totas las collectivitats, de la pus pichona a las mai bèlas, a nommar d'elegits referents, per que las associacions de terren ajan d'interlocutors. Aquí ont i a qualqu'un per parlar, aquí ont i a aquela representacion politica, i a d'avançadas. Qualqu'un senhala d'alhors, per anar dins aqueste sens, que l'OPLO aviá fait un kit a destinacion de las collectivitats.

L'òrdre del jorn agotat, l'AG es clausurada a 12h30.